



Ji olên mirovatiyê **Ola Konfûşiyos**

Cankurd

27.03.2006

Li ba Çîniyan **Konfûşiyos** bi "**Şah**" tê navkirin. Ew sala 551ê berî zayîna hezretî **Isa** ji dayîk bûye û sala 479ê ji dinyayê koç kiriye.

Di vê olê de, ne keşe, ne rabîn, ne pîr û ne mele hene. Kenîse, camî an perestgeh nînin. Dogmayek baweriyê jî tune ye. Ne dûroka afirandinê, ne behîşt û ne jî dûjeh, tew Xwedê jî di nav bawerîya Konfûşiyosan de tune ye, tenê pênc armancên zevînî û mirovî hene:

- **Maldarî**
- **Rûmet**
- **Gelek Kur**
- **Jînek dirêj û xweş**
- **Mirinek baş.**

Xalika giringtir di nasdariyên **Konfûşiyos** de sîniç e "*Exlaq*" e. Divê ew kesê, ku vê hildigire di jîna xwe ya malbatî û ya civakî de bi xelkê re hevsaz û dirist be.

Şah "**Konfûşiyos**" dibêje, ku hêza mezintirîn a asîman û zevînê di pêdakirinê de ye. Her tişt li ser wê avabûye û ava dike. Zevîn tovê dide, ro û baranê jî şîyanê didin.

Ev bingeha hişmendî û jînaristina konfûşiyosî ye. Mirov di pirtûkên **Konfûşiyos** de berhemê hevsaziya asîman û zevînê ye, li ba wî ne Xwedê, ne jî can û rewan derveyê hişmendîya mirovî hene, lê belê binesaziyek cîhanî heye, weku di ezmanan de saziyek bingehîn heye, sirûşt jî li saz e. Hema ew nabêje ev hevsazî ji ku ve hatiye, çawa pêda bûye. Li ba wî civat û jîna kesanî jî pêdivê bingeh û zagonê ne.

Di jîna **Konfûşiyos** de hovîtiyek bê wekanî li **Çînê** hebû, kuştinekê kuştinek dihanî û tolhildanekê tolhildanek dihanî. Di navbera du şahdariyan (**Lu û Tsîn**) de neyartiyek mezin û dirêj hebû. Şah **Lu** ji hişmendîya **Konfûşiyos** hezkir û ew kir şêwirdarê xwe, û bi taybet dema wî gotinin wek van gotinên hêja dikirin.

[Deban "*sîlah*" bi xwe re nebaşiyê tînin, evana ne acetên rûmetdaran in, tenê gava çareyek dî namîne, mirov dikare wan bi kar bîne.]

[Jiyan qencî ye.]

[Ewê bi hiş dikare serweriyê bike, pêdiviya wî bi çek û debanan tune ye.]

Dawî gava herdu şah (**Lu û Tsîn**) li hev hatine, û ji şah **Lu** re hinde jinên bi evîndariyê navdar bûn û 120 hespên kumêt wek diyarî ji şah **Tsîn** de hatine, şah **Lu** bi wan gêro û sermest bû, şalyar û filozofê xwe **Konfûşiyos** ji bîr kir. Wî jî seriyê xwe rakir û ji ba wî koç kir.

Di geriyane de gelek şagird, ji wan (72) peyrewên bijarte ramanên wî li welêt belav kirin, û **Konfûşiyos** bi "**Keyserê fêrkinê**" hat naskirin. Bi rêya **Mêngst** ê xort û wefadar bîr û baweriyên wî hatin hilgirtin û Konfûşiyosî di dewletê de hat çandin û nema tê sîlkin.

Tevî ku 50 salî berî ji dayikbûna hezretê **Isa** – *Silav lê bin* – ola **Buda** derket holê, û wek wê jî **Lawtsî** û **Tawîsî** di **Çînê** de xort û bi hêz bûn, lê belê Konfûşiyosî hîn jî, ta niha, çax û damarên xwe berdane nav gelêd **Çînê** û li hember dîktatoriya Komonîstiyê berxwe dide.

[Weku di ezmên de royek heye, di malbatê de mêrek heye, wilo di welêt de jî divê keyserek hebe. Ev histobariya xwe ya asîmanî digire, û lew re bi "Kuré ezmên**" tê navkirin.]**

Mêngst, ku yekemîn şagirdê **Konfûşiyos** bû (371 b.Z.) bîr û baweriyên seydayê xwe şirove kirin û asantir belav kirin. Ew dibêje:

[Du zorbazên dema berê hebûn, Kîh û Çaw. Hem deselatdariya xwe û hem jî gelên xwe winda kirin. Wan gel winda kirin gava dilê gel ji dest xwe dan. Rêyek heye, ku tu deselatdariyê û gel bo xwe vegerîni, ew jî rêya dil e.]